

摘藻堂四庫全書薈要

經部

欽定四庫全書薈要

經部

欽定禮記義疏卷三十六

詳校官編修臣程嘉謨



欽定四庫全書
養要卷二千四百九十九

經部

欽定禮記義疏卷三十六

郊特牲第十一之一

正義孔氏穎達曰按鄭目錄云名曰郊特牲者以其記郊天用騂犢之義此於別錄屬祭祀



德明曰郊者祭天之名用一牛故曰特牲 方氏

慈曰禮莫重於祭祭莫重於郊而郊以養牲為重
故此篇言禮以郊特牲為首因名其篇焉 王氏

曰此篇皆記祭事而雜昏冠兩段

存疑黃氏乾行曰冠昏兩段宜歸之冠義昏義

案孔疏言郊特牲至降尊就卑覆說以少為貴之義是與禮器本一篇而後人斷之也其以郊特牲名篇舉首三字耳廣記祭禮而原本考始使習禮者不徒狃器數之末正承忠信禮之本來故首揭之曰貴誠曰貴質曰交於且明曰不同於安樂明仁人孝子之用心而先王制祭之精意藉以傳矣

尊天子故首郊郊之祭天子得行之天子微諸侯
僭而禮不可問矣庭燎以下痛失禮之事惡作始
之人大書持書春秋之旨也若夫冠昏則因祭而
及之所謂禮器是故大備也禮有五經莫重於祭
故末仍以祭言黃氏必歸之冠昏義則不見禮器
之大備而必摘著代字為社稷主先祖後字為總
言祭則又拘矣

郊特牲而社稷大牢天子適諸侯諸侯膳用犢諸侯適

天子天子賜之禮大牢貴誠之義也故天子牲孕弗食

也祭帝弗用也

膳市戰反犢音
獨孕餘證反

正義鄭氏康成曰犢者誠慈未有牝牡之情是以小
為貴也孕任子也 孔氏穎達曰天神至尊無物可

稱故用特牲社稷功及於人人賴其功故以大牢報
祭也天子巡守至諸侯之國諸侯致膳於天子則用
犢諸侯朝天子天子賜之禮則用大牢郊之特牲亦
犢也言社稷大牢以明郊用特牲言諸侯大牢以明

天子用犢顯其貴誠之義也 周氏諤曰誠者純一而未散者也牲孕則散矣故天子弗食而祭帝弗用也

通論陸氏佃曰周禮曰以冬日至致天神又曰凡樂圜鍾為宮黃鍾為角冬日至於地上之圜丘奏之蓋以其所在言之則謂之郊以其所祭言之則謂之丘或曰圜丘之祭玉用蒼璧牲用蒼犢樂用圜鍾而南郊之祭其玉四圭有邸其牲騂犢其樂黃鍾各不同

何也聖人制祭有降神之牲又有祀神之牲有禮神之玉又有祀神之玉有降神之樂又有祀神之樂夫豈一端而已亦各有所當也 方氏慤曰天子有天地之德故諸侯以事天地者事天子諸侯有社稷之功故天子以禮社稷者禮諸侯惟其稱而已禮器言天子祭天特牲王制言天子社稷皆大牢掌客言王巡守殷國則國君膳以牲犢王合諸侯而饗禮則具十有二牢其言正與此合凡此則尊者常小而少卑

者常大而多故曰貴誠之義蓋誠在內而不在外故也天子牲孕弗食則諸侯容或食之言祭帝弗用則社稷容或用焉周氏諳曰言郊則天神與地祇也詩序曰昊天有成命郊祀天地也書曰用牲于郊牛二蓋一則用於南郊以祀天神一則用於北郊以祭地祇是天神地祇皆用特牲然則五帝與昊天同用特牲可乎五帝與昊天同用大裘而冕則同用特牲不亦可乎

存疑孔氏穎達曰郊與配坐皆特牲故下文云養牲必養二又名誥云用牲于郊牛二是也 皇氏侃曰

圜丘之祭祭日之旦王立丘之東南西嚮燔柴及牲玉於丘上升壇以降其神次又奏圜鍾之樂六變以降其神天皇為尊故有再降之禮次則掃地而設正祭置蒼璧於神坐以禮之其在先燔者亦蒼璧也次則薦血腥祭天無裸則祭天唯七獻也故鄭注周禮云大事於太廟備五齊三酒則圜丘之祭與宗廟祫

同朝踐王酌泛齊以獻是為一獻后無祭天之事大

宗伯次酌醴齊以獻是為二獻王進爵之時皆奏樂

但不皆六變次薦孰王酌盞齊以獻是為三獻宗伯

次酌醴齊以獻是為四獻次尸食之訖王酌朝踐之

泛齊以獻是為五獻又次宗伯酌饋食之醴齊以獻

是為六獻次諸臣為賓長酌泛齊以獻是為七獻以

外皆加爵非正獻之數其尸酢王以清酒酢宗伯以

昔酒酢諸臣以事酒

案再降及七獻說不見所據要之郊祀儀節其詳本不可得聞

然總不當以廟祭為準也况又憑臆以斷之乎

方氏慤曰郊用特牲而名

誥言牛二者兼稷牛言之耳經言帝牛不吉以為稷牛蓋謂是矣

存異孔氏穎達曰鄭氏謂配天之人虞夏商周各異文具祭法周人則以饗配之祭法禘饗是也其感生之帝則以后稷配之五時迎氣及雩祭則以五方人帝配之九月大饗則以五人帝及文武配之以文王配五天帝則謂之祖以武王配五人帝則謂之宗祖

宗通言社稷之牲則黝色牧人云陰祀用黝牲則神州亦用黝牲也其樂俱用大蕤與應鍾故大司樂云乃奏大蕤歌應鍾以祭地祇其玉則神州用兩圭有邱社稷無文崔氏云當與神州同其服社稷則締冕皇氏侃曰天有六天歲有八祭冬至圜丘一也夏正郊天二也五時迎氣五也通前為七九月大饗八也雩與郊禱為祈祭不入數

辨正劉氏彝曰鄭氏引小宗伯兆五帝於四郊又引

司服王祀昊天上帝則大裘而冕祀五帝亦如之是皆正經而謂天為有六則誤矣萬物資始於乾元資生於坤元聖人受命於天資於萬物以養兆民不敢忘乎其所自也即圜丘以祀昊天上帝者報本也兆於四郊以祀五帝者迎時氣也報本所以神天之道迎氣所以神天之時欲神而報之莫知其神之所在故望其昊昊然則圜丘報本之義生焉望其五方之色則兆於四郊之禮作焉亦猶宗廟一祖也而六饗

行焉故天雖曰神地雖曰祇亦強名而神之者也何以知其然哉案大司樂職云乃分樂而序之以祭以享以祀乃奏黃鍾歌大呂舞雲門以祀天神若夫地示則與四望山川各異其樂天神至尊一樂而已明其神之不二也又大裘而冕圜丘五兆不異此服示其同也聖人之意其在茲乎 陳氏祥道曰鄭氏之徒謂四圭之玉黃鍾大呂之樂夏正以祀感生帝於南郊蒼璧之玉六變之樂冬至禮天皇大帝在北

極者於圜丘天皇大帝曜魄寶也五帝太微之帝也
分郊與丘以異其祀別四帝與感生帝以異其禮王
肅嘗攻之矣然肅合郊丘而一之則是以五帝為人
帝則非有天地則有五方有五方則有五帝月令五
人帝伏羲神農黃帝少皞顓頊而已果以是為五帝
則前此其無司四時者乎 程子曰帝者氣之主也
東則謂之青帝南則謂之赤帝西則謂之白帝北則
謂之黑帝中則謂之黃帝豈有上帝而別有五帝之

理此因周禮言祀昊天上帝而後又言祀五帝亦如
之故諸儒附此說 朱子曰周禮說上帝是總說帝
說五帝是五方帝說昊天上帝只是說天鄭氏以昊
天上帝為北極非也北極星只是言天之象 又曰
萬物本乎天人本乎祖故以所出之祖配天地周之
后稷生於姜嫄以上更推不去文武之功起於后稷
故配天須以后稷嚴父莫大於配天宗祀文武於明
堂以配上帝上帝即天也聚天之神而言之則謂之

上帝 馬氏端臨曰祀天莫大於郊祀祖莫大於配

天四代之郊見於祭法經文簡略後之學者莫不求之鄭注而鄭見祭法序禘於郊之上於是意禘之所祀者亦天故盡以為祀天然康成漢人也西漢之郊祀襲秦制而雜以方士之說於是以太為有六以祀六帝為郊注二禮凡祀天處必指以為所祀者某帝其所謂天者非一帝故其所謂配天者亦非一祖於是釋禘郊祖宗以為或祀一帝或祀五帝各配以一

祖其病蓋在於取讖緯之書解經以秦漢之事為三代之事然六天之說遷固志之其繆亦非始於康成也

案鄭氏於天帝二字知其為一而云皇天上帝亦名昊天上帝又析而為二以皇天為北辰曜魄寶上帝為太微五帝王肅起而辨之程朱諸儒從而正定之然孔云指其清虛在上之體謂之天因其生育之功其別有五故謂之五帝以五配一故謂之六五帝者

非天何為同服大裘則孔固以天帝為一矣若夫郊之配以后稷報本之義取諸冬也大饗之配以文考告成之義取諸秋也孝經云郊祀后稷以配天宗祀文王於明堂以配上帝其明證也鄭氏既以祭法之禘為圜丘為祭昊天而配嚳郊為祭上帝而配稷祖宗為祭五帝於明堂而配文武又以大傳之禘為郊祀天又祀感生帝不幾自相矛盾邪夫仁人饗帝孝子饗親一而已程子曰人子不可一日不見父母人

君不可一歲不祭天孫奭曰歲九祭皆主於天至日
圜丘正月祈穀五時迎氣孟夏大雩季秋大饗考之
於經皆有明文斯定論也皇氏所列僅八祭而云雩
與郊禘為祈祭不數崔氏謂雩亦常祭凡九然孟春
之祈穀亦祈也可不數乎至雩祭有二孟夏大雩常
也因旱而雩變也泥於變而并沒其常毋亦未之深
考與至地祇之外別有神州之祭此亦鄭孔之感於
緯書者先儒亦詳斥之矣

總論孔氏穎達曰郊特牲以下至降尊以就卑文承禮器覆說以少為貴之事

大路繁纓一就先路三就次路五就郊血大饗腥三獻燔一獻孰至敬不饗味而貴氣臭也諸侯為賓灌用鬱鬯灌用臭也大饗尚股脩而已矣

繁步干反燔亦作燔夕廉反灌本又作裸

古喚反服
丁喚反

正義鄭氏康成曰此因上說以少為貴者血腥燔祭用氣也大饗饗諸侯亦不饗味也孔氏穎達曰對

次路故稱先路每加以兩故次路五就郊血以下因
貴少更說不貴味也崔氏云周禮郊燔柴為始宗廟
裸為始社稷血為始小祀醢辜為始此云郊血至孰
者謂正祭之時薦於尸坐之前也諸侯為賓灌用鬱
鬯者灌猶獻也謂諸侯來朝在廟中行三享竟然後
天子以鬱鬯酒灌之也故大行人云上公王禮再裸
而酢侯伯一裸而酢諸子諸男一裸不酢鄭注云王
禮王以鬱鬯禮賓也鬱鬯是臭故云灌用臭也此亦

明貴氣之禮大饗尚脩者謂諸侯行朝享及灌以後而天子饗燕食之也上公三饗三食三燕侯伯再饗再食再燕子男一饗一食一燕其行饗之時雖設大牢之饌於時先薦脩於筵前然後始設餘饌故云尚脩此亦明不饗味之義也方氏慤曰經曰血腥燭祭用氣也以臭生於氣故此曰氣臭脩言牲肉如脩脩則以薑桂脩之諸侯為賓即大饗之時天子饗諸侯於廟中然非君三重席之饗也鬱鬯可以

養陽脰脩可以養陰養陽不以酒醴養陰不以犧牲則以所饗在臭而不在味也

通論陳氏祥道曰鬱鬯陽物也脰脩陰物也用陰物所以神之尚陽物所以明之而其所以不饗味一也又曰諸侯之朝為之飲以醉其德設之食以重其禮亦謂之饗者何邪蓋饗於陰則幽明通而凡所謂饗神與鬼者皆所以通幽明者也饗於陽則上下通而凡所謂饗於人者皆所以通上下者也蓋明不通

則幽不格上不通則下不懷 陳氏澔曰諸侯來朝以客禮待之是為賓也享畢天子以鬱鬯灌之諸侯相朝亦然

案此一節覆論郊祀之禮大路郊之車也而先路次路之繁其飾者不得與焉貴誠之義也郊血也而腥燂熟不得並焉貴氣臭亦貴誠之義也此亦如社稷大牢之不得同於特牲也云爾諸侯為賓而灌用鬱鬯大饗而尚股脩亦上文引天子適諸侯諸侯適天

子意夫郊天子之事也即以天子禮明之故注疏無諸侯相朝文

存疑鄭氏康成曰禮器言次路七就與此乖字之誤也孔氏穎達曰禮器非兩加之差故鄭知為誤也辨正陳氏祥道曰次路兼革木二路則殷之次路有五就七就二者鄭以禮器七就為誤是過論

大饗君三重席而酢焉三獻之介君專席而酢焉此降

尊以就卑也

重直龍反
酢才各反

正義鄭氏康成曰言諸侯相饗獻酢禮敵也

孔疏三重席是

諸侯禮而又稱君故知諸侯相饗下云降尊就卑是尊卑不敵故云獻酢禮敵也

三獻卿大

夫來聘主君饗燕之

孔疏五等諸侯有九獻七獻五獻故五等諸侯之卿皆三獻也

以介為賓賓為苟敬

孔疏賓為苟敬燕禮記文

則徹重席而受酢

也專猶單也

孔氏穎達曰此論尊卑之席周禮司

几筵諸侯莞筵紛純加纁席畫純卿禮三獻其副既

是大夫與卿為介謂之三獻之介此介是大夫大夫

席雖再重今為介降一席祇合專席主君若受此介

之酢爵雖應合三重之席必徹去重席而受此介之
酢爵焉所以然者降諸侯之尊以就介之卑故也

方氏慤曰兩君相見其體相敵故其席如其數而不
必增損焉至於他國之卿來聘而大夫為之介位雖
臣也命則君也名雖介也禮則客也其文雖殊其義
則相敵故主君之受酢降重席之尊而不與之異就
專席之卑而必與之同也 徐氏師尊曰君不殺席
而如常受之非敬客之義也降尊就卑庶在彼不失

使臣之體而在我得盡為主之心所謂曲而殺者也
豈若兩君相敵可以直行者哉

通論孔氏穎達曰案燕禮無賓酢公禮至說屨升坐
後賓媵觶於公公受賓爵飲以賜下此云受酢蓋謂
此也或可燕已臣子賓不酢公若與鄰國賓燕以介
為賓賓得酢公也

存疑陳氏祥道曰周官天子之席不過三重諸侯之
席止於二重則君之席三重是殷制也

案殷制說
不知何據

饗禘有樂而食嘗無樂陰陽之義也凡飲養陽氣也凡
食養陰氣也故春禘而秋嘗春饗孤子秋食耆老其義
一也而食嘗無樂飲養陽氣也故有樂食養陰氣也故
無聲凡聲陽也

禘依注作禴下春禘同食音嗣
又或云而食嘗無樂五字衍

正義鄭氏康成曰言義同而或用樂或不用樂也此
禘當為禴字之誤王制曰春禴夏禘 孔氏穎達曰

饗謂春饗孤子禘春祭宗廟也

案此禘
亦作禴

食謂秋食耆

老嘗秋祭宗廟也飲饗清虛養陽氣故有樂而食是

體質養陰氣故無樂 皇氏侃曰春是生養之時故

饗孤子取長養之義秋是成熟之時故食耆老取老

成之義也 陳氏祥道曰禘禘皆陽義也莫盛於禘

嘗烝皆陰義也莫盛於嘗春陽中也秋陰中也凡聲

皆陽也凡味陰也故禘以饗先王饗以待孤子皆用

樂焉所以象雷之發聲於春也嘗以饗先王食以養

耆老皆不用樂焉所以象雷之收聲於秋也月令於

仲春雷乃發聲言習樂於仲秋雷乃收聲而不及樂

盖亦饗禘有樂而食嘗無樂之意

通論孔氏穎達曰周四時祭皆有樂祭統云內祭則大嘗禘升歌清廟下管象是秋嘗有樂也王制夏后氏養老以饗禮無秋食殷人養老以食禮無春饗周人脩而兼用之則春夏用饗秋冬用食皆用樂故文王世子云凡大合樂必遂養老注云春合舞秋合聲下云養老之禮遂發咏焉登歌清廟是秋時養老亦用樂也陳氏祥道曰先王老吾老以及人之老所

以教天下之孝幼吾幼以及人之幼所以教天下之
慈又況出身戮力而死於王事者在上有父祖在下
有子孫棄而不養不足以報勞養不以禮不足以示
勸故春饗孤子秋食耆老而外饗酒正遺人司門橐
人皆共其職事焉然則必出於遺人司門者用以利
犯禁之財養以義死政之老與其孤則趨利者知所
媿而循義者知所勉矣然春饗孤子秋未嘗不食而
以饗為主秋食耆老春未嘗不饗而以食為主周禮

言饗者老孤子則饗與食固兼用也者老養於學孤子亦養於學文王世子反養老幼於東序謂各反其國養老幼如東序之禮也 又曰冕而總干施於食禮而記稱食嘗無樂者考之於詩商頌言顧予烝嘗而有執鼓淵淵嘒嘒管聲小雅言以往烝嘗而有鍾鼓既戒鼓鍾送尸則嘗有樂矣樂師饗食諸侯序其事令奏鍾鼓鍾師凡饗食奏燕樂籥師賓客饗食鼓羽籥之舞則食有樂矣其曰食嘗無樂非殷周之制

也

存疑陸氏佃曰饗禘有樂而食嘗無樂此周禮也殷人尚聲雖食嘗猶有樂祭統曰大嘗禘升歌清廟下而管象魯殷禮也公食大夫無樂食禮也然則少牢饋食特牲饋食主嘗言之與

鼎俎奇而籩豆偶陰陽之義也籩豆之實水土之品也不敢用褻味而貴多品所以交於旦明之義也

奇居宜反下同

褻息列反旦
依注作神

正義鄭氏康成曰且當為神篆字之誤也 孔氏穎

達曰此論鼎俎籩豆所法陰陽之事鼎俎盛牲體牲
體動物屬陽故其數奇籩豆兼有植物植物屬陰故
其數偶神以多大為功故貴多品案聘禮正鼎九陪
鼎三鼎別一俎俎亦九又少牢五鼎五俎其所俎一
非是正俎特牲三鼎三俎是皆鼎俎奇也案掌客云
上公豆四十俎伯三十二子男二十四又禮器天子
之豆二十有六諸公十有六諸侯十有二上大夫八

下大夫六案禮籩與豆同是籩豆偶也 方氏慤曰
籩之實若菱芡之類豆之實若芹蒲之類所謂水之
品也籩之實若棗栗之類豆之實若菁蕘之類所謂
土之品也

通論孔氏穎達曰鄉飲酒義豆數有奇者是年齒相
次非正豆也士喪禮注小斂一豆一籩者又不同於
吉故也

存疑鄭氏康成曰水土之品言非人常所食 孔氏

穎達曰籩豆所充實之物皆是水土所生品類非人所常食神道與人異故不敢用人之食味 陳氏祥道曰不敢用褻味所以盡志貴多品所以盡物 陸氏佃曰旦明蓋指裸獻之時至朝而踐則象朝時事親所進也於是始有籩豆之薦雖有籩豆然不敢用褻味而貴多品是乃所以交於旦明之義也案籩人掌四籩之實自朝事而下則裸無籩豆之薦非特諸侯相朝雖祭亦爾也

案此因上陰陽之義而謂鼎俎籩豆品數無非效法之事也鄭以注不敢用褻味不知人所食孰非水土所生乎水土之品至多而天子之豆二十有六是亦非多品也不敢字貫褻味與多品言之疏及陳氏祥道俱分兩截看疏又歸重多品俱非禮器云薦不美多品亦貴誠之義也

賓入大門而奏肆夏示易以敬也卒爵而樂闋孔子屢歎之奠酬而工升歌發德也歌者在上匏竹在下貴人

聲也樂由陽來者也禮由陰作者也陰陽和而萬物得

易以致反闕苦
穴反匏步郊反

正義鄭氏康成曰賓朝聘者易和說也屢歎美此禮也發德者以詩之義發明賓主之德匏笙也得得其所孔氏穎達曰此論朝聘之賓及己之臣子有王事勞者設燕饗之禮奏樂之節朝聘之賓行朝聘既畢燕享之時燕則大門是寢門享則大門是廟門也示易以敬者示主人和易嚴敬於賓也卒爵而樂闕

者饗時主君親獻賓賓親酢主君賓主俱作樂也孔子屢歎之者善其和易恭敬之義奠酬而工升歌者饗時主君親酬賓賓初奠酬薦東於時即工升歌也歌者在上匏竹在下解所以不升笙之義歌是人聲可貴故升之在堂上匏竹可賤故在堂下然瑟亦升堂者瑟工隨歌工故也發德發明賓主之德也樂由以下因上有賓主禮樂之事遂說禮樂之義陽天也天以氣化故作樂象之樂以氣為化是樂由陽來者

也氣化謂五聲八音陰地也地以形生禮以形為教是禮由陰作者也形教謂尊卑大小拜伏之事也

方氏慤曰易則賓主之情不離敬則賓主之情不流不流不離禮樂之道也夫禮減而進以進為文樂盈而反以反為文爵始卒而樂遂闋則能以反為文矣此先王之微意也故孔子屢歎之且卒爵則酬酢之禮畢而賓主之德已明矣樂之闋也不亦宜乎主酌賓曰獻賓答主曰酢主復答賓曰酬禮成於三奠酬

則禮成而賓主之德可知也故樂工升歌以發之升

歌即仲尼燕居所謂升歌清廟示德是矣或言發或

言示互相備也歌者在上故經每謂之升歌匏竹在

下故經每謂之下管周氏諳曰禮樂之始雖由於

陰陽及其妙也則能統陰陽育萬物故曰陰陽和而

萬物得周官曰禮樂合天地之化百物之產其此之

謂乎陸氏佃曰凡樂三闋入門而縣興升堂而樂

闋一也賓飲畢樂闋二也主人受酢飲畢樂闋三也

奠酬而工升歌發德也所謂德發揚詡萬物者此與
通論孔氏穎達曰大射禮主人納賓是己之臣子賓
入不奏肆夏燕禮記若以樂納賓則賓及庭奏肆夏
鄭注卿大夫有王事之勞者故知此為朝聘之臣及
己臣有王事之勞者也大射禮主人獻賓賓啐酒樂
作主人受賓酢不作樂也獻卿後大夫媵爵於公所
謂酬公奠酬未畢於時工升歌賓奠酬時未升歌也
劉氏彝曰入門而縣興乃奏肆夏之樂所以示天

子同樂易之德降接於羣臣以將其敬也然則為賓者乃其臣也此文王所以致多士而作周也卒爵而樂闋孔子屢歎之者謂君能降禮下交於臣以竭其歡心臣能盡忠以答於上以成其亨泰位天地育萬物由其禮樂行而陰陽順也

案又因上祭義而及燕享以明禮之原於陰陽而化及萬物也

旅幣無方所以別土地之宜而節遠邇之期也龜為前

列先知也以鐘次之以和居參之也虎豹之皮示服猛也束帛加璧往德也

別彼力反往德
熊本作任德

正義鄭氏康成曰旅衆也鐘金也獻金為作器鐘其大者以金參居庭實之間示和也孔氏穎達曰此明朝聘庭實之物幣庭實也衆國貢獻非止一方故云無方宜者五方各殊所出所以分別土地所生之宜也期者六服遠近所貢之屬各有期也前龜後皮帛以金參廁其中故云以和居參之也玉以表德享

用束帛帛上加璧是表往歸於德也謂主君有德而往歸之 劉氏彝曰六服諸侯更番以四仲月來朝則任土作貢隨其國之所有或金或玉或匭或包如禹貢九州之物無定法也而國服遠近不同必使番休六年一徧而每朝王必皆助祭執籩豆駿奔走則不可在禴祠烝嘗之後也故曰節遠邇之期焉其朝宗覲遇也或受饗於朝或受饗於廟備陳衆國充庭之物則九江納錫大龜者荊州之所貢也以為前列

者先其靈知能照國家之災祥也先儒考夏書無以
鐘為貢幣者以鐘為金則厥貢惟金三品以其從革
可柔可剛有利國之義故謂之和 陳氏祥道曰普
天之下莫非王土率土之濱莫非王臣故衆幣所以
無方也土地之宜在物而遠近之期在人周官六服
其見有六歲之差其交有六物之異六物之異者所
謂別土地之宜六歲之差者所謂節遠邇之期也示
服猛者所以明德威畏也

通論陳氏祥道曰周官大宰以九貢致邦國之用有
祀嬪器幣財貨服苻物之貢其制地貢在大司徒其
施邦國之貢在大司馬其物則職方氏揚州之金錫
荊州之丹青青州蒲魚雍州玉石之類是也其用則
大府邦國之貢待弔用是也然邦國有歲之常貢有
因朝而貢歲之常貢則春入貢是也因朝而貢則侯
服歲一見其貢祀物之類是也二者之禮雖殊其玉
帛庭實之設蓋亦相類考之覲禮侯氏奉玉帛以升

庭實旅百先龜次金次丹漆絲纊馬在其南若皮則居馬之位而王特撫玉而已以示致方物者臣之職而不有其物者王之道也禹貢惟冀州無貢以畿內王之所專特斂其賦而已非所謂貢也 又曰禮器言大饗之所貢故言三牲魚腊以至丹漆絲纊竹箭之類此言常貢之法則陳其大率而已此詳略所以不同也

案旅幣無方矣而必別土地之宜不求之非產而使

其難得節遠邇之期不責之非時而使其難繼仁之
至義之盡也若其陳設之先後亦各有義焉先知以
見德之明無不照服猛以見德之威無不畏然而明
或至於察威或流於暴必有其相濟者而盛德之動
乃為中和焉金之為物可柔可剛且變金言鐘或於
陶鑄之義有取乎因以往德結之禮器言王化之廣
博故終之以致遠物此究制作之精微故終之以往
德 又案此一章申上篇理義之文極之和陰陽育

萬物莫不由此也

庭燎之百由齊桓公始也大夫之奏肆夏也由趙文子

始也

燎力
妙反

正義鄭氏康成曰庭燎之差公蓋五十侯伯子男皆三十百僭天子也肆夏僭諸侯也趙文子晉大夫名武孔氏穎達曰庭中設火以照燎來朝之臣因名火為庭燎百者作百炬列於庭也大戴禮云天子百燎齊桓僭用後世襲之是失禮從桓公始也大射禮

燕禮諸侯納賓用肆夏今文子亦奏之故云僭諸侯
此謂納賓樂也 陳氏祥道曰天下有道天子馭諸
侯諸侯馭大夫而禮樂有差天下無道諸侯僭天子
大夫僭諸侯而禮樂無別周之天子無道故桓公僭
天子之禮而至於庭燎之百趙文子僭諸侯之樂而
至於奏肆夏記者錄而罪之以其濫觴於一時而致
洋溢乎天下後世也 應氏鏞曰大夫之僭起於諸
侯之失禮而已故此篇之譏自齊桓趙文子始焉夫

齊桓將仗義以服諸侯也乃自以庭燎之百誇其尊則何以責夫諸侯趙文子輔其君以霸者也而自僭肆夏霸國之禮已失矣則何以責夫大夫

通論孔氏穎達曰周禮九夏王夏者天子所用其餘八夏諸侯皆得用之其陔夏卿大夫亦得用之故鄉飲酒客醉而出奏陔夏但非堂上正樂所用也

總論孔氏穎達曰自此以下至由三桓始也總論朝聘失禮之事 應氏鏞曰禮運自天子祭天地至諸

侯非問疾弔喪而入諸臣之家凡八條皆以明諸侯之失禮而大夫之失禮居其三此篇自庭燎之百至為君之答已也凡十餘條皆以明大夫之僭禮而諸侯之僭天子居其三焉世愈降而失愈甚亂愈速孔子曰禮樂征伐自諸侯出十世希不失矣信哉

朝覲大夫之私覲非禮也大夫執圭而使所以申信也不敢私覲所以致敬也而庭實私覲何為乎諸侯之庭為人臣者無外交不敢貳君也

覲大力反
使色吏反

正義鄭氏康成曰朝覲其君親來其臣不敢私見於
主國君也以君命聘則有私見 孔氏穎達曰大夫
從君朝覲而行私覲是非禮也若受命執圭專使鄰
國得行私覲故聘禮有私覲所以申己之誠信也從
君而行不敢私覲所以致敬於己君也周衰有臣從君
而私設庭實私覲於主國之庭作記者譏之無外交
者為人之臣唯專一事君不敢貳心於他君也

通論陳氏祥道曰檀弓曰大夫束脩之間不出竟左

傳曰策名委質貳乃辟也此所謂人臣無外交而不貳君也 馬氏晞孟曰大夫無執圭禮此執圭荀子謂聘人以圭記亦曰以圭璋聘重禮也則知此非所執之圭也

存疑鄭氏康成曰何為乎諸侯之庭非其與君無別也外交謂私覲也

辨正徐氏師魯曰舊說謂設庭實以為私覲非禮愚謂從君私覲即非禮不必庭實與君無別而後為非

禮也

大夫而饗君非禮也大夫強而君殺之義也由三桓始也天子無客禮莫敢為主焉君適其臣升自阼階不敢有其室也覲禮天子不下堂而見諸侯下堂而見諸侯天子之失禮也由夷王以下

阼才路反

正義鄭氏康成曰大夫饗君由強且富也三桓魯桓公之子莊公之弟公子慶父公子牙公子友慶父與牙通於夫人以脅公季友以君命鳩牙後慶父弑二

君又死也

孔疏三桓以下並公羊文

天子無客禮明饗君非禮也

天子不下堂見諸侯正君臣也夷王周康王之元孫

之子

孔疏案世本康王生昭王昭王生穆王穆王生恭王恭王生懿王懿王崩弟孝王立孝王崩懿

王太子變立是為夷王也

時微弱不敢自尊於諸侯

孔氏穎達

曰大夫富強專制於君名君而饗之非禮也大夫干

國亂紀君能殺之得其義也三桓之前齊公孫無知

衛州吁宋長萬皆以強盛被殺而云由三桓始者據

魯而言覲禮天子負斧依南面侯氏執玉入是不下

堂見諸侯也夷王下堂見諸侯自此以後或有然者故云以下 馬氏晞孟曰率土之濱莫非王臣故天子無客禮莫敢為主焉天子燕禮則以膳夫為主諸侯燕禮則以宰夫為主示其君之尊而莫敢與之抗禮也為人臣者不敢有己而况於有室乎

通論孔氏穎達曰覲禮不下堂見諸侯若春朝夏宗則以客禮待諸侯以車出迎故齊僕云各以其等為車送逆之節 陳氏祥道曰三代之制刑不上大夫

伯者之法亦曰無專殺大夫古之任大夫以賢待大
夫亦以禮其有至於殺者其始也任之不以賢故其
終也不可待之以禮耳春夏萬物聚見之時朝宗之
禮不純以臣待諸侯明其恩也於秋萬物分辨之時
覲禮純以臣待諸侯明其義也此天子之德所以常
感於下而其勢所以常隆於上夷王於秋覲而下堂
見之是自卑以起諸侯之僭自弱以起諸侯之強至
平王東遷而齊王室於邦君降忝離於國風者非由

此哉

存疑黃氏曰魯自三桓執政日衰一日豈能殺強臣
蓋殺者降殺之義 陸氏佃曰季友鳩叔牙使若託
以疾死然於慶父緩追逸賊皆親親之道即非以君
命殺之又季友不應在三桓之列且古者殺大夫非
義也大夫見殺非智也其或有罪則遷就而為之諱
所謂蓋蓋不飾是也後世大夫世執國政君由是弱
矣有殺之者更以為義則若三家者有以啓之也經

是以云

案為亂禮之始即有可殺之義正殺之者之為義則
僭之者愈不容誅絕三桓傲天下也記若曰大夫而
有自強以饗其君者是亦三桓也殺之可也義也比
事屬辭而饗君之失禮愈明於天下矣乃陸氏謂親
親之道即非以君命殺何邪又謂友不應在三桓之
列三桓非惡名其強也可殺其忠也可歸諱三桓而
并沒友之所自出於義何居

諸侯之宮縣而祭以白牡擊玉磬朱干設錫冕而舞大
武乘大路諸侯之僭禮也臺門而旅樹反坫繡黼丹朱
中衣大夫之僭禮也故天子微諸侯僭大夫強諸侯脅
於此相貴以等相覲以貨相賂以利而天下之禮亂矣
諸侯不敢祖天子大夫不敢祖諸侯而公廟之設於私

家非禮也由三桓始也

縣同懸錫余章反坫丁念
反繡或作綃音消黼音甫

正義鄭氏康成曰宮縣四面縣也

孔疏小胥天子宮
縣四面皆懸若宮

之有

干盾也錫傅其背如龜也

孔疏詩云鏤錫錫以
金飾也謂用金傅盾

背盾背外
高如龜

武萬舞也白牡大路殷天子禮以上皆天

子之禮也旅道也屏謂之樹樹所以蔽行道管氏樹

塞門塞猶蔽也禮天子外屏諸侯內屏大夫以簾士

以帷反坫反爵之坫也

孔疏明堂位云反坫出尊則坫為尊而設故知反坫反爵

也盖在尊南兩君相見主君既獻反爵焉

孔疏論語邦君為兩

君之好有反坫獻酬之禮更酌酌畢各反爵於坫上

繡黼丹朱以為中衣領緣

也

孔疏中衣以素為之繡黼為領丹朱為緣

以上皆諸侯之禮也 孔氏

穎達曰諸侯惟合軒縣

孔疏三面如轎車之有蕃

今乃有宮縣又

諸侯祭用時王牲今用白牡又諸侯擊石磬今擊玉

磬又諸侯得舞大武不得朱干設錫冕服今朱干設

錫冕而舞大武諸侯合乘時王之車今乃乘駟之大

輅並是諸侯之僭禮也樹立也人君當門道立屏蔽

內外為敬也坻以土為之黼刺繒為黼文也禮公之

孤四命則爵弁自祭天子大夫四命亦當爵弁自祭

則中衣得用素但不得綃黼為領丹朱為緣耳自臺

門以下於時大夫皆有此事故言僭禮也相貴以等

謂臣下不畏懼於君而擅相尊貴以等列相覲以貨者大夫私相覲以貨賄不辟君也 方氏慤曰微故

見脅強故敢僭四者之言亦互相明爾相貴以等則爵不足以馭其貴相覲以貨則祿不足以馭其富相賂以利則予不足以馭其幸大宰八柄詔王馭羣臣以此三者為先三者苟失天下之禮由是亂矣諸侯有國而已故不敢祖天子大夫有家而已故不敢祖諸侯以其不敢祖天子故立始祖而有五廟之制以

其不敢祖諸侯故立別子而有五宗之法 陳氏澔
曰舊讀繡為綃今如字繡黼者繡刺為黼文也丹朱
染繪為赤色也中衣者朝服祭服之裏衣也制如深
衣但袖小長耳冕服是絲衣則中衣用絹素皮弁服
朝服玄端是麻衣則中衣用布也

通論孔氏穎達曰公羊傳云周公用白牡又明堂位
曰祀周公於大廟牲用白牡擊玉磬則皋陶謨云鳴
球是也祭統云朱干玉戚冕而舞大武明堂位云魯

君孟春乘大路皆天子禮樂特賜周公魯惟文王周公廟得用之用於他廟則為僭他國諸侯非二王之
後祀受命之君而用之皆為僭也 朱子曰諸侯不
得祖天子然左氏云鄭祖厲王何也此必周衰諸侯
僭肆做此違條碍法事故公廟設於私家

存疑鄭氏康成曰仲孫叔孫季孫氏皆立桓公廟魯
以周公之故立文王廟

孔疏襄十二年秋吳子壽夢
卒臨於周廟禮也注謂文王

廟三家見而僭焉

案春秋文十三年世室屋壞傳云周公稱大廟魯公稱世室羣公稱宮未聞大廟世室而外立文王廟魯頌鋪張寢廟莫若閔宮一篇毛鄭以閔宮為姜嫄廟呂氏大臨非之朱子以為魯之羣廟則大廟世室皆在其中若魯果有文王廟閔宮何不頌之僖八年禘於大廟亦但祀文王於周公之廟未聞祀於文王廟而以周公配之况殷周之禘亦禘於大祖契稷之廟未為高辛立廟也周即有姜嫄廟要祀稷所自出之

帝於稷廟禘為天子之大祭天子且不為大祖所自出者立廟魯何獨以周公之故而立文王廟乎襄十二年吳子壽夢卒魯臨於周廟即周公廟也注何所據以為文王廟邪孔疏引以為證誤矣

存異孔氏穎達曰此經云諸侯不敢祖天子而文二年左傳云宋祖帝乙鄭祖厲王大夫不敢祖諸侯而莊二十八年左傳云凡邑有宗廟先君之主曰都彼據有大功德者天子之子以上德為諸侯得祀所自

出公子為大夫得立宗廟於采地故邑有先君之廟
曰都王子母弟無功德不得封食采圻內亦得立祖
王廟故周禮都宗人家宗人掌祭祖王廟此據尋常
諸侯大夫也

案經云諸侯不敢祖天子大夫不敢祖諸侯而疏引
宋祖帝乙鄭祖厲王及左傳邑有宗廟先君之主曰
都之文推論之以為據有大功德者是蓋援周公為
例不知春秋時事未足舉以定禮而孔所論尤非也

天子之子以上德封不得以上德祖天子且孔言無功德不封亦於采地立祖王廟是無宗不祖天子矣有此禮乎宋祖帝乙所謂存二代之後不得援以為他諸侯例明堂位言以禘禮祀周公於大廟不言祀文王魯且不得祖文王鄭又安得祖厲王乎且左傳晉以魯喪未見鄭伯鄭言亦敝邑之憂是晉鄭皆宗魯也吳子卒魯臨於周廟是吳亦宗魯也魯為諸姬之大宗昏喪必告而王姬歸齊季姜歸周天子不與

諸侯敵故昏嫁多魯主之若魯祖文王則大祖當祀

文王而周公不當為祖稱大廟祫禘亦當於文王廟
不於周公廟矣若季氏雖為三家之大宗而君在國
昏喪皆告於君君之嫁娶亦不使季主而援魯例立
桓公廟且八佾歌雍以祭之尤倍矣邑有先君之廟
如武王遷鎬而文王廟猶在豐故成康大事告廟必
至豐晉遷新田而桓莊廟猶在曲沃故曰曲沃君之
宗非王子公子各得立祖廟於其邑也周禮都宗人

家宗人掌都家之祭祀凡祭祀歸福於國國有大故
令禱祀既祭反命於國並無掌祖王廟之文蓋所祭
者即此有邑者之祖父臣祭亦歸福於公曰膳君有
故禱祀亦及先臣所謂羣公先正百辟卿士之有益
於民者又或地有名山大川及因國在其地而無主
後者非祖王也說經欲以明禮反曲為非禮者緣飾
附會可乎

總論孔氏穎達曰此總論諸侯及大夫奢僭強盛之

事

天子存二代之後猶尊賢也尊賢不過二代

正義鄭氏康成曰過之遠難法也二或為三 孔氏

穎達曰天子繼世而立子孫以不肖滅亡見在子孫
又無功德所以存之者猶尚尊其往昔之賢但代異
時移今古不一若皆法象先代不可盡行故所尊之
賢不過取二代而已

通論孔氏穎達曰公羊說存二王之後所以通夫三

統之義左氏說周家封夏殷二王之後以為上公封
黃帝堯舜之後謂之三恪鄭云所存二王之後者命
使郊天以天子之禮祭其始祖受命之王自行其正
朔服色恪者敬也敬其先聖而封其後與諸侯無殊
何得比夏殷之後熊氏云周之三恪越少昊高辛遠
存黃帝者取其制作之人故易繫辭云神農氏沒黃
帝堯舜氏作義當然也

案王者存先代之後仁也其不過二代義也禮運云

杞宋之郊禹契是天子之事守然則非二代固不得用天子禮樂祭其受命之王無疑也記者言此以申明上文諸侯不敢祖天子之義二代於周為客則天子無客禮可知

諸侯不臣寓公故古者寓公不繼世

寓音遇

正義鄭氏康成曰寓寄也寄公之子非賢者世不足尊也寓或為託孔氏穎達曰此論寄公之子為臣之事喪服傳云寄公者何也失地之君也或天子削

地或被諸侯所逐皆為失地不臣者不敢以寄公為臣也 方氏慤曰所以不臣寓公者以其常為南面之君故也然以失地則其賢不足尊也故古者不使之繼世 徐氏師曾曰不敢為臣仁也然不繼世義也

通論彭氏曰德非象賢固不足繼而其國繼統有人則其祖宗之祀亦不絕矣其出也苟非有甚惡則其國於易世之後亦可以復返其子孫而收卹之或其

子孫果賢雖不反其家國而異國亦可隨才而錄用
之使其本國果無後則興滅繼絕之仁為方伯者自
當任其責矣

案記者記此以申明不敢祖諸侯之義

君之南鄉答陽之義也臣之北面答君也大夫之臣不
稽首非尊家臣以辟君也

鄉許亮反下
同辟音避

正義鄭氏康成曰答對也辟君辟國君也 孔氏穎

達曰諸侯則稽首於天子大夫則稽首於諸侯家臣

不稽首者非是尊敬此家臣不令稽首以臣於國君已皆稽首今大夫之臣又稽首於大夫便是一國兩君故云以辟君也 方氏慤曰南者陽之位北者陰之位君以陽明為德故南鄉而有答陽之義所以向明也臣以陰順為德故北面以答君所以示順也周官大祝辨九拜而以稽首為先則稽首者首至地而為禮之隆也諸侯之大夫陪臣而已以陪臣之卑而可以當拜禮之隆乎必有君道之尊者乃可以當此

坊記大夫不稱君則大夫固無君道矣 余氏心純
曰天秩天叙天命天討一皆奉承天道之德威而不
失是謂答陽之義守典奉禮受命行法無非將順大
君之德威而不失是謂答君之義故答不專是向也
通論孔氏穎達曰大夫得稽首於諸侯不辟天子者
諸侯有大功德出封畿外專有其國故大夫得盡臣
禮以事之 方氏慤曰君非臣之所敵故不可言答
臣臣者君之所統故不可言答陰於君曰鄉則不斥

其體君尊故也

大夫有獻弗親君有賜不面拜為君之答已也

為于
為反

正義鄭氏康成曰不面拜者於外告小臣小臣受以

入也小臣掌三公及孤卿之復逆

孔疏大僕掌諸侯
之復逆御僕掌羣

吏之逆及庶民之復鄭注
復謂奏事逆謂受下奏

孔氏穎達曰大夫有物

獻君使人獻之不親來獻君有物賜大夫不面自來

拜所以然者恐君之答已故不自來不報而去方

氏慤曰此謂諸侯大夫諸侯雖有君道然亦天子之

臣耳故於大夫有相答之禮焉獻弗親有賜不面拜
非敢怠也慮煩君之答已而已親則必面獻亦必拜
其言互備也 馬氏晞孟曰非不役志於獻而有慢
君之賜也蓋禮無不答而上之不虛取於下也為其
君之答已故弗親不面拜禮從其簡而已亦所以尊
君也

鄉人禘孔子朝服立於阼存室神也

傷 楊音

正義鄭氏康成曰禘強鬼也謂時儼索室毆疫逐強

鬼也禡或為獻或為儺朝服立於阼神依人也 孔
氏穎達曰此論孔子存神之事鄉人驅逐強鬼孔子
恐廟神有驚恐身著朝服立於廟之阼階存安廟室
之神所以朝服者大夫朝服以祭故用祭服以依神
徐氏師曾曰室神先祖五祀之神

通論馬氏晞孟曰儺者索室以去其不祥其法見於
周官方相氏而其事見於月令之季秋孔子聖人德
合於神明矣非俟於索室以去其不祥然必從鄉人

之儼者不違衆以立異也

存異葉氏夢得曰楊讀如陽儼有二名儼猶禳也以
禦陰為義故文從儼楊猶禳也以抗陽為義故文從
易此以存室神也故以楊為名鄭氏以為強鬼之名
誤也

案儼鄙事即思及室神之驚恐而朝服以存之則聖
人之精義也葉氏楊讀如陽謂以抗陽為義則非也
聖人扶陽抑陰豈與陽相抗哉

孔子曰射之以樂也何以聽何以射孔子曰士使之射不能則辭以疾縣弧之義也

縣音懸
弧音胡

正義鄭氏康成曰何以聽何以射多其射容與樂節相應也 孔氏穎達曰孔子既美射之與樂相應又論身之不可不習為士之法理合能射今使之射若其不能便是乖於為士之義也

存疑鄭氏康成曰男子生而設弧於門左示有射道而未也

孔疏以其未能所以懸之今辭以疾而不能與初生懸弧相似故云懸弧之義也

案射義男子生桑弧蓬矢以射天地四方蓋示人以
有志於所事何嘗示人以所未能若縣弧果示以所
未能則此亦直以不能辭之可矣何必辭以疾要知
所謂縣弧之義者蓋惟義本當能而不能則非懸弧
立志之義故第託疾辭之庶無負於其義耳

孔子曰三日齊一日用之猶恐不敬二日伐鼓何居

齊側

皆反

正義鄭氏康成曰居讀為姬語之助也何居怪之也

伐猶擊也齊者止樂而二日伐鼓則是成一日齊也
孔氏穎達曰凡祭必散齊七日致齊三日不樂不
弔專其一心用之祭祀猶恐為敬不足於時祭者致
齊三日之中而二日伐鼓使祭者情散意逸故譏而
問之

案家語云季桓子將祭齊三日而二日鐘鼓之音不
絕冉有問而孔子答之蓋散齊七日致齊三日齊而
伐鼓故孔子非之

孔子曰繹之於庫門內祊之於東方朝市之於西方夫

之矣

繹音亦祊
百彭反

正義鄭氏康成曰祊之禮宜於廟門外之西室

孔疏
禮器

為祊乎外故知在外西是鬼神之位室
又求神之處故知在廟門外之西室

繹又於其堂

神位在西也

孔疏祊是求神之名繹是接尸之稱求
神在室接尸在堂故云繹又於其堂

此二者同時而大名曰繹其祭禮簡而事尸禮大

孔疏

儀禮有司徹是大夫備尸也但於堂上獻尸獻侑全
無室中之事又絲衣云自堂徂基自羊徂牛是祭神
也下云兕觥其酥旨酒思柔是接
尸也故知祭神禮簡而事尸禮大
朝市宜於市之東

偏周禮市有三期大市日側而市百族為主朝市朝時而市商賈為主夕市夕時而市販夫販婦為主

孔氏穎達曰祊是室內求神繹是堂上接尸一時之事春秋宣八年壬午猶繹詩絳衣云繹賓尸但有繹名而無祊稱是大名曰繹繹祭當於廟門外之西堂今乃於庫門內祊當在廟門外西室今乃於廟門外東方皆違禮故言失之矣天子諸侯謂之為繹在祭之明日於廟門外西室及堂而行禮也

通論陳氏祥道曰禮有正祭之祊有繹祭之祊求諸遠者也祊於西尊其右也詩云以往烝嘗或剝或烹或肆或將而繼之以祝祭於祊此正祭之祊也禮言設祭於堂為祊乎外家語言繹祭於祊此繹祭之祊也正祭之祊於門內之西室故毛氏釋詩以祊為門內繹祭之祊位於門外之西室故鄭氏釋郊特牲以祊為門外蓋祊其位也繹其祭也賓尸其事也繹祭謂之祊而祭之祊不謂之繹繹之名特施於天子諸

侯賓尸之名亦施於卿大夫鄭氏以卿大夫賓尸在堂故謂祔於門外之西室繹又於其堂孔氏穎達申之云求神在室接尸在堂於義或然 成氏伯璵曰繹者言絡繹相連續殷曰彤言融融不絕夏曰復胙復追昨日之祭繹祭本為賓尸也賓尸在堂上告神則入室是門外之西室孝子求神非一處也正祭之日祝告至室又延尸於堂又繹之於廟門之外不知神之所在於彼乎於此乎不知其所享也注正祭之

日又設饌於門側階詩曰祝祭于祊此門旁也恐非
門內之西室周氏諤曰詩之序曰絲衣繹賓尸也
詩又曰祝祭于祊蓋廟門外謂之祊而繹者紬繹而
求之也繹之於祊一祭也今若離之為二祭其說非
也

存疑孔氏穎達曰上大夫曰儻尸與祭同日於廟堂
之上而行禮也下大夫及士雖有獻尸及賓等相酬
酢行禮於廟之事不謂之儻尸也東方朝市謂朝時

而市當於東方謂市內近東也今乃於市內西方
陸氏佃曰祔在當日繹在明日故曰繹又祭也鄭氏
謂二者同時而大名曰繹非是

案天子諸侯之繹在祭之明日大夫儻尸與祭同日
士不謂之儻尸並合禮經自不可易大夫祭日儻尸
禮之常也其不儻尸者以祭時或有事變故缺之非
以上下大夫分儻尸與不儻尸也賈孔二疏之說已
於有司徹中詳悉辨正此不得仍其謬

社祭土而主陰氣也君南鄉於北墉下答陰之義也日
用甲用日之始也天子大社必受霜露風雨以達天地
之氣也是故喪國之社屋之不受天陽也薄社北牖使
陰明也

大音秦喪息浪反薄本
又作亳步各反牖音酉

正義鄭氏康成曰墉謂之墉北墉社內北墉也國中
之神莫貴於社故日用甲大社王為羣姓所立屋之
北牖絕其陽通其陰而已薄社殷之社殷始都薄
孔氏穎達曰土謂五土山林川澤丘陵墳衍原隰也

以時祭之故云社祭土土是陰氣之主故云主陰氣也社既主陰陰宜在北故祭社時以社在南設主壇上北面而君來在北墻下而南鄉祭之是答陰之義也達通也風雨至則萬物生霜露降則萬物成故不為屋以受霜露風雨是天地氣達也喪國社者謂周立殷社以為戒天是生法無生義故屋隔之令不受天之陽也薄社即殷喪國社也既屋之塞其三面惟開北牖示絕陽而通陰陰明則物死也 陳氏祥道

曰王與諸侯之社皆三其二社所以盡祈報之誠其勝國之社所以示鑒戒之理先王之祭社稷春有祈秋有報孟冬大割祠此祭之常者也凡天地大裁之類祭大故天裁之弭祀君行有宜宮成有衅此祭之不常者也常者用甲其他則惟吉而已祭之牲以大牢其遇裁則用幣而已攷之於禮王之祭也南面其服希冕其牲用黝其祭血祭其尊大壘其樂應鍾其舞帔舞其鼓靈鼓凡皆因其物以致其義焉 方氏

慈曰社必用日之始何也蓋陽始於甲而物生陰極於辛而物成地雖以陰而成物然始地事者存乎陽故社用甲以原其始焉天雖以陽而生物然終天功者存乎陰故郊用辛以要其終焉夫獨陰不生獨陽不成天地相須之義也故聖人制禮以致其義焉達者上則達天之氣以濟乎下下則達地之氣以濟乎上也 陳氏澔曰薄書作亳薄社於周為喪國之社必存之者白虎通云王者諸侯必有誠社示有存亡

也

通論孔氏穎達曰天子諸侯各有二社為羣姓立者在庫門內之西自為立者在藉田之中其亡國之社穀梁傳云以為廟屏戒或在廟或在庫門內之東則亳社在東也社皆有稷亡國之社亦有之故士師云若祭勝國之社稷則為之尸是也其社主用石案條牒論稷壇在社壇西俱北向營并壇共門或曰在社壇北其用玉無文今禮用兩圭有邸 傳氏咸曰祭

法王社大社各有其義穀梁傳曰天子親耕故自立社為藉而報也國以人為本人以穀為命為百姓立社而祈報焉事異體殊此社之所以有二 馬氏晞孟曰曲禮言外事用剛日內事用柔日郊者外事也社者內事也而此言郊用辛日之柔社用甲日之剛者說者以為郊社至尊之祭不可同於內外此說得之

辨正朱子曰或說稷是丘陵原隰之神或云穀神看

來穀神較是社是土神又問社如何有神曰能生物
便是神也 楊氏復曰王鄭之學互有得失若鄭言
勾龍有平水土之功配社祀之后稷有播種之功配
稷祀之則鄭說為長 又曰案禮經天子祭天地諸
侯祭社稷祭莫重於天地而社稷其次也胡氏乃合
祭地祭社二者而一之何也

案社以祭五土之神所謂勾龍為社是也而非祭地
祭地則大司樂方丘之祭耳彼經言方丘而不言社

則方丘之非社明矣中庸郊社之禮及此記社神地道說似專指祭地言或以上與地本一故即以祭五土之名加之祭地要之皇地祇與勾龍之祀其尊卑輕重本不可混也自經論之圜丘祭天在南郊天與地偶則方丘祭地自應在北郊此外凡大社王社等之不在北郊者並勾龍之社而非皇地祇之方丘諸儒未審第知中庸及此經之社為祭地遂合凡社字皆以祭地目之并有謂古無北郊者曷不取大司樂

之文一思之耶此記之社本據祭地言故下節合天地對舉之但所謂薄社者又以勝國之社言之則此記方丘之社自包入勾龍之社矣

總論孔氏穎達曰自此至反始也總論社神之義兼明所祭之禮

社所以神地之道也地載萬物天垂象取財於地取法於天是以尊天而親地也故教民美報焉家主中霽而國主社示本也唯為社事單出里唯為社田國人畢作

唯社丘乘共粢盛所以報本反始也

乘時證反共音恭
粢音資盛音成

正義鄭氏康成曰中霤亦土神也二十五家為里畢

作人則盡行非徒羨也

孔疏周禮小司徒凡起徒役
無過家一人以其餘為羨則

家一人之外
皆為羨也

丘十六井也四丘六十四井曰甸或謂

之乘乘者以於車賦出長轂一乘乘或為鄰

孔疏丘
十六井

以下皆司
馬法文

孔氏穎達曰言立社之祭是神明於地

之道也地載萬物者釋地所以得神之由天垂象者
欲明地故引天為對地有其物天上皆垂其象所謂

在天成象在地成形也取財於地者財產并在地出
為人所取也取法於天者人知四時早晚皆放日月
星辰以為耕作之候所取法者故尊而祭之所取財
者故親而祭之地既為民所親故與庶民祭之以教
民美報故也卿大夫之家主祭土神於中霤天子諸
侯之國主祭土神於社示其生養之本也社事祭社
事也單盡也社既為國之本故若祭社則合里之家
盡出故云單出里也此惟每家出一人不人人出也

惟為社田國人畢作者祭社先為社獵則國中之人皆盡行也唯社丘乘共粢盛者嚮說祭社用牲此明祭社用米也丘乘者都鄙井田也九夫為井四井為邑四邑為丘四丘為乘唯祭社而使丘乘共其粢盛也粢稷也稷曰明粢在器曰盛所以報本反始結美報也 馬氏晞孟曰天以生物為功而其功幽故聖人闡之而為郊所以明天之道也地以成物為功而其功顯故聖人則斂之而為社所以神地之道也以

天遠於人則尊而不親地近於人則親而不尊故在天則明之欲民尊而親之也在地則神之欲民親而尊之也萬物本乎天而亦本乎土故家以中霤為主國以社為主者示其不敢忘本之意也唯為社田國人畢作人不愛其力也唯社丘乘共染盛人不愛其財也此皆報本反始之意也方氏懋曰取財則有所養養者母道也取法則有所教教者父道也天地之所施於人者固美矣則人之報也可不盡其美哉

徐氏師曾曰凡祭皆有分限唯社無所不通故家
以中霤為主是鄉大夫得祭也國以社為主是天子
諸侯得祭也土者物生之本始報本故禮無不至反
始故心無弗齊是庶人亦得祭也然此特論其通乎
上下云爾至於稱名之異品物之殊則亦未嘗無別
也

通論孔氏穎達曰案祭法云大夫以下成群立社曰
置社注云大夫不得特立社與民族居百家以上則

共立一社今時里社是也 周氏譜曰周官以血祭

祭社稷五祀中雷五祀之一而社稷之次故有國者
以社為主而有家者則中雷而已社事單出里所以
重民也社田畢作欲其皆曉於戰陣也 方氏慤曰

社者陰之神軍者陰之事使軍賦之家而共染盛於
社各從其類也故將出征則宜乎社不用命則戮於
社軍行則祓於社凱旋則獻於社皆以是爾故此不
曰丘民而必曰丘乘也以非祭社則不必如是故每

言唯焉 劉氏彝曰役於公則家有定負役於社則
羨徒皆作人人求福於其身也

餘論張子曰大夫以下成羣立社若謂大夫長於塵
里之間與百姓居者立社則大夫與百姓同事於社
稷似非其類恐是士大夫以下各以其輩類立社也
然士大夫方社之日當從其君以禮社則所事於置
社者或以子弟家老行事也今貴至天子賤至農夫
皆知禮社獨士大夫之家不預社事是不知身之所

從來殊無戴天履厚之報古者丘乘共染盛恐十里之中立一社也

存疑鄭氏康成曰單出里皆往祭社於都鄙

孔疏周禮都鄙

公卿大夫采地公卿大夫祭社其里之人皆往就祭此據采地言之

季春出火為焚也然後簡其車賦而歷其卒伍而君親誓社以習軍旅左之右之坐之起之以觀其習變也而流示之禽而鹽諸利以觀其不犯命也求服其志不貪其得故以戰則克以祭則受福

卒祖忽反鹽依注作艷

正義鄭氏康成曰凡出火以火出建辰之月火始出

焚謂焚菜也簡歷謂算具陳列之也君親誓社誓吏

士以習軍旅既而遂田以祭社也言祭社則此是仲

春之禮也

孔疏此經無祭社之文禮連前經祭社之事故云是仲春之禮

仲春以火

田田止弊火然後獻禽

孔疏周禮大司馬職文引之證仲春火弊而田止

至

季春火出而民乃用火

孔疏案司燿季春出火民咸從之

今云季春

出火乃親誓社記者誤也

孔疏謂作記之人見季春民之出火謂為焚菜祭社

故稱季春也

社或為省流猶行也行行田也鹽讀為艷

孔疏

鹽艷聲
相近

行田示之禽使歌艷之觀其用命否也謂禽
為利者凡田大獸公之小禽私之失伍而獲猶為犯
命是求服其志不貪其得也 孔氏穎達曰此論仲
春祭社之前田獵取禽以祭社獲福之事祭社既用
仲春用焚當在仲春記者以季春民始出火遂誤以
天子諸侯用焚為季春也既焚之後簡選車馬及兵
賦器械之屬歷其百人之卒五人之伍君親誓此士
衆以習軍旅既而遂田以所得之禽獸因以祭社故

云親誓社觀其習變者或左或右或坐或起以親自
觀其習武變動之事也教陣訖而行田禮驅禽於陣
前以示士卒是流示之禽也利則禽也驅禽示之而
歆艷之以小禽之利也於此之時觀其士卒犯命與
否者求欲服其士卒之志使進退依禮不欲貪其犯
命苟得於禽言失伍得禽猶不免罰也其所為得禮
故戰則克勝祭則受福 方氏慤曰社主陰陰主殺
則為社而有田因田而習軍旅月令所謂教於田獵

以習五戎車攻所謂因田獵而選車徒皆謂是爾車
賦者即司馬法自六尺為步積之至於通通十為成
成出革車一乘是矣小司徒之職五人為伍五伍為
兩四兩為卒卒伍者軍旅之法立於伍成於卒故也
大司馬曰選車徒以至車驟徒趨車馳徒走險野人
為主易野車為主皆簡歷之也誓即所謂羣吏聽誓
於陳前是也誓特誓田而已而曰社者以為社而田
故也左之右之即以旌為左右和門是矣坐之起之

即以教坐作進退之節是矣流示之禽者驅其禽而流行以示之所謂設驅逆之車是矣此則鹽之以利也夫田之獲禽猶戰之獲虜獲虜有賞而獲禽則無賞所謂大獸公之小禽私之是賞之之意也若失伍而獲禽則所利者小所害者大必有罰焉蓋小人見利而忘法凡此但求服士卒之志使之不失伍爾不貪其所得之禽也 馬氏晞孟曰車賦者戰之器也有器則不可無人故卒伍者戰陣之人也歷有試之

之意 徐氏師曾曰此因社言之者其義有三人
心繫於社稷一也兵衆聚於社二也君親誓於社三也
有國者安得不謹兵戎重祭祀以安人心而衛社稷
哉此先王制禮之深意也

通論李氏覲曰守國之備不可以不素習也然若無
故而習是習殺人也非示天下不復用兵之意故因
春蒐夏苗秋獮冬狩而教焉鳥獸魚鼈皆函血氣若
無故而殺是暴天物也作禽荒也故因祭社享禘祀

禘享烝而行焉明非好兵也為田獵也非好田獵也
為祭社也外以彰事神之禮內以作不虞之備聖人
之動其慎如此 周氏諳曰火星以春見以秋沒故
季春出火季秋納火皆聖人後天而奉天時也則為
焚者特其出火之一事耳田獵之禮或行於仲月或
行於季月周官則行於仲月豳詩月令與此行於季
月不必同

欽定禮記義疏卷三十六



總校官庶吉士臣侍朝
校對官檢討臣王鍾健
謄錄貢生臣蘇日柄